

UPA 2017 Inissiisarfinnut inissinneqartussatut eqqartuunneqartut

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarneq pillugu inatsisip (Inissiisarfinnut inissinneqartussatut il. il. eqqartuunneqartut) allanngortinnissaat pillugit inatsisissatut siunnersuummut missingiummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut (Isumaginninnermut, Ilaqutariinnermut, Naligiissitaanermut Inatsisinillu Atuutitsinnermut Naalakkersuisoqarfik

Akissuteqaat

(Isumaginninnermut, Ilaqutariinnermut, Naligiissitaanermut Inatsisinillu Atuutitsinnermut Naalakkersuisoq)

Aappassaanneerinninneq

Naalakkersuisut aallarniutigalugu Inatsisinut Ataatsimiititaliap Inatsisartut aalajangiiffigisassaattut siunnersuummut sukumiisumik suliarisimaneranut qutsavigaa.

Inatsisissatut siunnersuummi periarfissiissutigineqarpoq kalaallit innuttaasut Herstedvesterimi Paarnaarussivimmi inissisimasut, tamanna kissaatigigunikku Danmarkimi inissisimanertik ingerlatiinnarsinnaagaat. Taamaattoq inatsisissatut siunnersuummi kalaallit paarnaarussat Nuummi inissiisarfimmuut nutaamut nuunnissaminnik toqqaasimasut, toqqaanerminnik peqqissimilernissaat periarfissiissutigineqanngilaq.

Inissiisarfinnut inissinneqartussatut eqqartuunneqartut Herstedvesterimit Nuummut nuutinneqarnissamik toqqaasimasut, Inissiisarfinnut inissinneqartussatut eqqartuunneqartup aalajangiinini peqqissimissutigilerpagu, Herstedvesterimut utertinneqarnissamut periarfissaqarnissaata ammaaneqarnissaa, Inatsisinut Ataatsimiititaliap isumaqatigiittup sukumiisumik suliarinninnermini pisariaqartissimavaa.

Taamatuttaaq Inissiisarfinnut inissinneqartussatut eqqartuunneqartut Herstedvesterimiiginnarnissamik toqqaasimasut, neqeroorutinik immikkut ittunik ullumikkut periarfissarisaminnik atuiinnarsinnaanissaat, Inatsisinut Ataatsimiititaliap isumaqatigiittup kissaatigaa, matumani ilaatigut kalaallisut atuartinneqarneq, kalaallit nerisassaataat, kiisalu ingiaqateqarluni Kalaallit Nunaannukarluni aneqqanissaq imaluunniit qanigisanut pulaarnissaa ilaallutik.

Naalakkersuisut Inatsisinut Ataatsimiititaliap isumaliutissiissutaa taperserpaat aammalu allannguutissatut siunnersuutip akuerineqarnissaa inassutigalugu.